

## CONVENIO DE COLABORACIÓN ENTRE O SERVIZO GALEGO DE SAÚDE E A DEPUTACIÓN PROVINCIAL DE PONTEVEDRA, A TRAVÉS DO SEU MUSEO, PARA A POSTA EN MARCHA DO PROGRAMA DE PRESCRICIÓN SOCIAL E CULTURAL NA ÁREA SANITARIA DE PONTEVEDRA E O SALNÉS

### MEMORIA XUSTIFICATIVA

O xerente do Servizo Galego de Saúde, DECLARA:

Que o Servizo Galego de Saúde formalizou, o día 14 de xullo de 2025, coa Deputación de Provincial de Pontevedra o instrumento convencional arriba referido, que ten unha vixencia dun ano, a contar desde o día seguinte ao da súa sinatura. Non obstante, de conformidade co establecido no artigo 49 da Lei 40/2015, do 1 de outubro, de réxime xurídico do sector público, antes da finalización do prazo de vixencia, os asinantes do convenio poderán acordar a súa prórroga por un período de ata catro anos adicionais.

Que o instrumento convencional ten por obxecto, fixar as condicións de colaboración entre a Deputación de Pontevedra, a través do Museo de Pontevedra e o Servizo Galego de Saúde para implantar no ámbito de Área Sanitaria de Pontevedra e O Salnés un programa de prescrición cultural que se articula arredor de varios obxectivos fundamentais:

1. Fomentar a inclusión social e a participación comunitaria: promover a interacción social mediante a prescrición de actividades culturais, xa que axuda a combater a soidade e o illamento. As actividades en grupo, como obradoiros e visitas guiadas, fomentan un sentido de pertenza e fortalecen os lazos comunitarios.
2. Prover alternativas terapéuticas non farmacolóxicas: complementar os tratamentos médicos tradicionais a través dunha intervención cultural que poida mellorar a saúde das e dos pacientes sen a necesidade de medicamentos adicionais.
3. Promover o acceso á cultura: facer a cultura accesible para todas as persoas, empregando a arte e as actividades culturais como unha parte do tratamento integral, e axudar a eliminar as barreiras económicas e sociais que dificultan o acceso a esta.
4. Avaliar a efectividade da prescrición cultural: ofrecer datos valiosos para avaliar o impacto da cultura na saúde e a súa posible integración no sistema de saúde de Galicia a longo prazo.

O programa inclúe un sistema de seguimento para avaliar o progreso das e dos pacientes durante a súa participación nas actividades culturais, e de igual xeito, o programa estará suxeito a unha avaliación continua para medir o seu impacto na saúde das e dos pacientes.

Que existe converxencia de intereses entre as entidades asinantes en orden á consecución do obxectivo referido.

Que o instrumento convencional que se asinou se fundamenta no seguinte:

Que o Servizo Galego de Saúde de acordo co establecido na Lei 8/2008 de 10 de xullo, de Saúde de Galicia, coma no Decreto 145/2024 de 20 de maio polo que se establece a estrutura orgánica do Servizo Galego de Saúde, é un organismo autónomo de natureza administrativa, dotado de personalidade xurídica e plena capacidade para cumprir cos seus fins, adscrito á Consellería de Sanidade e configurado para o desenvolvemento axeitado das competencias que no ámbito sanitario lle corresponden á Comunidade Autónoma de Galicia.

Que o Decreto 134/2019 de 10 de outubro, polo que se regulan as áreas sanitarias e os distritos sanitarios do Sistema Público de Saúde de Galicia, configúranse ás áreas sanitarias como estruturas organizativas sen personalidade xurídica integradas na estrutura periférica do Servizo Galego de Saúde que xestionan, con autonomía funcional e de forma integrada, a xestión dos centros, recursos sanitarios, prestacións e programas de atención sanitaria, tanto a nivel de atención primaria coma hospitalaria, así como a coordinación sociosanitaria e de promoción e protección da saúde, no seu respectivo ámbito territorial.

Que o Museo de Pontevedra, é unha institución pública dependente da Deputación de Pontevedra, sen fins de lucro, ao servizo da sociedade e do seu desenvolvemento. A súa misión é formar, conservar, investigar, difundir e exhibir unha colección permanente de obxectos de arte, ofrecer exposicións temporais e cultivar e fomentar a arte cos medios adecuados a través da realización de actividades idóneas que procuren o desenvolvemento artístico e cultural da provincia, co desenvolvemento e participación en actividades de relación nacional e internacional.

O Museo de Pontevedra, para fomentar a concienciación, investigación e innovación arredor da cultura e da arte, procura promover a dinamización cultural, transformándose nun espazo cultural no que todos os públicos poidan gozar dunha programación vinculada ás exposicións, coma visitas guiadas e actividades complementarias ás propostas expositivas: obradoiros, conferencias, concertos, actividades culturais e outras.

Por esta razón, o Servizo Galego de Saúde, a través da Área Sanitaria de Pontevedra e O Salnés quere por en marcha un programa de prescrición social e cultural en colaboración coa Deputación de Pontevedra, a través do Museo de Pontevedra, coa finalidade de implantar un programa de prescrición cultural mediante o cal se mellor a calidade de vida dos/das pacientes mediante o uso de actividades culturais, talleres artísticos e outras actividades organizadas no Museo, ofrecendo unha ferramenta que poida integrarse nos tratamentos tradicionais de atención primaria e, no seu caso, especializada.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público pola que se traspoñen ao



ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de abril de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estimouse xustificado o recurso á sinatura do instrumento convencional, con exclusión doutras figuras.

E para que conste, asínase esta memoria, en Santiago de Compostela.

